



10

T 3205/2524.81





CHINESE JAPANESE LIBRARY
HARVARD-YENCHING INSTITUTE
AT HARVARD UNIVERSITY
APR 12 1940

儀徵志卷第二十一

列傳三

儒行

文學

義行

隱逸

僑寓

儒行

宋孫侔字少述先吳興人父及任簡州侔侔四歲而孤從母胡氏家揚州惕然自傷悲泣力攻義理之學七歲善屬文既長多所論撰皇祐間與王安石曾鞏遊知名江淮少許可不妄戲笑所居人罕識其面為文嚴勁簡古屢舉進士不中以母疾革終身不求仕進徙居揚子閉門讀書喜方書治藥餌故相晏殊知制誥唐詢錢公輔咸尊禮之嘉祐中劉敞知揚州薦侔詔以為試秘書省校書郎揚州教授五辭不赴英宗時知制誥沈遘王陶薦侔及汝陰王回常秩三人可備侍從皆除官侔不受命以不仕終

王令字逢原真州人有異才年十數歲晝從群兒戲夜必讀書家

哈佛大學漢和
圖書館珍藏印

傳往志卷三十一
一
貧無以自存徙居高郵王安石惜其才以其妻之弟妻之嘗作論語孟子解義安石嘗與語曰始得君文獨愛君才既而見君衣剝履缺坐而語未嘗及己之窮退而詢知君終歲食不葷不以銖忽妄售于人世之自立如君者有幾後居江陰卒年三十有八所著有廣陵集十卷蒙求一卷

明陳濟字用仁別號東莊性廉靜簡肅好讀書尤善于易嘗言人當見無始之始而度乃貞周孔本色爰象間如將見之若溯流討源義文固一以貫之也弘治壬子舉于鄉蹶計偕者七人勸之仕始就禮部晉登仕佐郎轉戶部差權北新關課粗足餘舶除上料外皆不稅公事多暇但焚香讀易尋請告歸初武宗南狩廷臣莫敢沮者濟執簡牘伏奏竟晝夜上不見可補而再奏者七每奏必廷杖凡七奏七杖皆竟七晝夜堅蹠不起其剛毅不回如此濟少

擅知人鑒與司馬黃瓚善瓚欲得佳婿相于塾時蔣山卿方八歲濟曰此子才王大化年十三濟曰此子才皆以女許之後二人同榜成進士又善筮知死生其兄澥卒濟自筮即命家人治殮具云明年某月日時吾須此矣及期果然臨終遺數十百言以勉二弟著六訓曰儉以養廉勤以厲鈍恭以生義靜以抑煩和以濟方晦以保名命子孫世守之尤禁浮屠爲厲濟生平事蹟舊志頗未詳即南狩諫章亦久失傳

許繼字崇志治蔡氏尚書學舉鄉貢八試春官不第當道多薦之亦不就繼少不羈長乃折節務學篤志聖賢之道喜怒不形舉止凝重嘗自言曰君子之學在修德檢身以全天地之中而科舉不與焉在太學司業羅欽順奇之曰非凡器也時王陽明湛若水論學東南並聞而重之平居閉戶默坐及與人講論言簡而理該人

莫能窺其際其學以收斂身心思誠力行為本不務訓詁詞章而
一主以靜自號靜齋世謂其宗陸氏學巡撫唐龍劉節相繼按部
躬造其廬年四十八卒

林之翰字爾憲三歲父亡母陳氏育之長而嗜學坐卧處皆書隨
處體認天理六字以自警萬曆庚子中鄉試習與鄒南臯徐匡嶽
潛心討論又于里中文山祠創建學會四方士多聚講焉天啓三
年除江西寧州守有二巨族以毀婚構訟久而不決翰至上官首
屬以是事翰但為正容說理即各省悟罷訟學使檄褫諸生三十
人翰力爭之諸生皆保全奸胥劉謙以私記索收租賦侵牟既多
而懼乃去而充按使掾更名仕君與免有訟之撫院者下寧州勘
理比訊云劉謙已死某非謙也翰佯不省但令各書其情及閱仕
君所書而怒曰活劉仕君何作死劉謙字耶謙語塞遂擬戍之州

民盧元洞山居僻險素不易勾攝州人訟以謀反撫院下監司檄
翰密率州兵往勦翰曰兵可易用乎吾將使之自至因宣言廳上
曰盧元洞不過鄉愚畏懼官府不敢來見耳豈謀反者越三日元
洞來見翰使赴監司自訴而誣乃白撫院聞而嘉之初寧民善逋
賦匿不至官試日執童子擊之責以償逋以是鮮與考翰諭曰有
司不能為朝廷催科反為朝廷閉塞賢路耶盡召之考一時皆謂
翰為儒吏云翰素篤孝因母亡哀毀過節而病劇尋卒江右刊行
有龍沙會語澹臺祠證學等編

字尚華字實夫年二十學舉業不成去而學賈三十尚居市肆買
易無異常人一日忽為王心齋木主祀之冠履衣服皆務與心齋
製合徧取古人書肆為觀覽則先讀孟子讀不竟不治他事不熟
則向心齋主跪讀竟日不起或自批其頰其治孟子瀏覽諷誦一

日中即辨數千言又或窮數日之力治一二句至浩然塞天地曰樂哉日月之經于天江河之行于地有如是氣矣自是經籍百家無不洞達出而遊學四方同學慕之嘗言赤子大人一而已矣又言至誠之道聚則爲物散則爲虛聚處是形氣故形于物散處是義理故歸于虛學者服其精旨默坐終日恒無一語一與人言機穎百倍有以制科勸之者微哂不荅徐而曰恐不如斯道之樂也作精一篇誠其子

論曰孫侔不妄戲笑不求仕進端人也王令衣刈履缺食不葷廉士也陳濟直言敢諫以剛毅聞氣節士也許繼凝重以靜爲學其傳本金谿故與王湛同臭味林之翰世稱儒吏居官以慈愛爲本不苛不察可謂隨處體認天理矣至李尚華以聚散分別形氣義理與中庸誠者物之終始朱子氣以成形理亦賦焉相背純乎金

谿姚江矣洛閩既遠元明以來講學者皆隨禪寂所以架漏千年而卒歸榛蕪也諸君子庶幾近之而所主則有別俟後人之論定焉

贊曰理性之學實維真儒功利辭章迺有歧塗五百年來誦法程朱闢此賢關啓我道樞苟能紹之是必吾徒

文學

宋艾晟字孚先進士授仁和縣尉後中宏詞科一等明年轉秘書省校書郎兼編修六典文字同館汪藻何臬胡松年孫覲咸見推許補外歷倅隰豐越三州有聲終考功員外郎

張翼嘉泰初舉進士第以從政郎任楚州學教授嘗作豐知郡祠堂記文詞典暢士林稱之

元蔣宮字伯雖三歲喪母哀毀如成人五歲誦孝經論語左氏春

秋十歲善屬文父喪勺水不入口毀瘠踰制時陳子山方銳意釋經宮乃列諸家傳疏得失以進子山異之授以詩書春秋宮輒悟其旨子山謂人曰明敏若宮雖汝南應世叔不足多也自是博極羣書于制度沿革陰陽歷數之義無不通元至正初中科舉選未幾丁祖憂負祖母避地浙東以薦授行樞密院管勾服除授崇明州判官攝州事有聲宮以道與衆忤謝官歸丙午明太祖定吳部使薦宮才可備史館授翰林修撰洪武紀元擢開封府蘭陽縣丞地當南北要衝兵燹之餘寇盜充斥居民存者十二三宮廣爲招徠一年復業五千餘戶弭災捍患掩骼埋胔通商販理冤滯安反側開學校崇德義邑人大和秩滿朝京以疾卒所著有經說文集百卷子武生謚恭靖別有傳

明陳立字可與洪武間鄉貢中式歷任鞏縣學訓益都學訓嘉興府學教明于知人遼府長史楊述嘗及門受學立奇之獎諭甚至述弱冠發解浙省人服其藻識

蔣主孝字務本有樵林摘藁無題詩曰鳳輦春游綉嶺宮閑庭小雨落殘紅貞元朝士知誰在一曲琵琶月正中又蔣主忠字存恕芙蓉詩曰清露下林塘波光淨如洗中有弄珠人盈盈隔秋水列朝詩集傳云皆太醫院判用文子也當時所稱景泰十才子者二人與焉

蔣鑛字鳴遠少敏悟博記經史爲文豐蔚條暢每試輒甲諸生成化間以毛詩領薦兩下春官第以疾卒人恒惜其才品

張景字文昭由太學生授河南鈞州同知爲政有聲以捕盜與守不協遂棄官而歸結社賦詩與黃頊殷和等爲雲林八友唱和成帙所著有益齋集

陳國光字尚賓任潮州府別駕時苗叛光督餉隨征苗挾之去光氣宇軒昂苗不能屈拜送至城下待罪後以嚴嵩事告退隆慶初邑侯申嘉瑞聘修縣志光之筆削居多年九十六卒有蜀泉集行世

朱永年字仲開其先常熟人遷家于儀六傳而至永年讀書有文譽十四補邑諸生嘉靖十二年貢南雍從祭酒呂柟游究心理學一時名籍甚筮仕光山令以儒術潤吏治撫循惠愛獄訟衰息吏部李時春謂之曰古循吏會方士陶仲文有寵于上以宮保銜奉命之興都監司臺使皆先驅郊迎而永年獨以長揖見仲文怒馳疏劾之免歸杜門著書肆力詞賦以卒所著有三山遊咏朱仲子集行世評者謂其如李何李

李祝字孟宣癸酉領鄉薦蕭以占馮開之兩太史嘗敘其文行世又工詩瑯琊下雉新安皆與倡和為忘年友郡守楊詢司理徐鸞聘修郡志李本寧勸試百甲始謁選得山東濟陽令治邑清錢穀懲猾胥建巽閣贈李于鱗之樓歸楊學士之墓政事鞅掌而文事仍應接不暇上司方以是奇之忽為飛語所中計典止量調祝飄然歸高卧田間黃中丞以詩勸駕曰莫倚文章能致身攻文今時亦悞人莫倚儒雅能飾吏儒雅反為俗吏忌祝亦作詩答之曰飲不必濟上水揚子江心堪洗耳食不必汶陽田銅山千頃禾如烟其恬淡高尚又如此著有青蓮館攝山草塞上擬古諸集屠緯真謂廣陵詩才祝猶過宗子相云

張桀字範中一字同塾幼篤志好學有聲膠庠嘉靖甲午恩拔即中是科鄉試公車不第桀略不以是介意而恥不多聞隱居澄江園潛心經史購求遺文寒暑搜討黃司馬瓚桀外祖也因即外家

藏書流覽廣識史得以肆力為文章瓚嘗修邑乘未竟槩索其遺稿增帙付梓義例該博巡鹽御史楊選慕其才檄轉運使陳暹修鹽法志以禮聘主筆削一時士大夫稱尊宿焉

李文字孟博嘉靖十五年以春秋應恩選貢入監生平積學嗜古文章近史漢氣格士遊其門者皆擅詩名初授浙江開化縣令俗狡獪難治文以廉服之以文章柔之頗有聲嗣以艱去服除補湖廣安鄉縣惠政復多士民歸德解組之後放逸林泉贊邑侯申嘉瑞裁纂隆慶間志著有詩宗類品諸書

李沾字允同父燦由明經入監仕夷陵別駕砥名節以與郡守不諧左遷禁藩審理拂衣歸沾善承父訓早有文譽以明經授山東日照令時妖寇剽掠青齊沾嚴守埤謹烽燧百姓恃以無恐任二武除錢穀簿書犁然整肅上司許其伯吏以年老告歸邑令姜琛

聘修縣志稿成而姜去未刊自隆慶迄崇禎七十餘年間事蹟實賴沾以傳

陳其訓字無競號念東以祖濟號東莊故也十五為諸生食廩從遊嘗百餘人十三經皆手錄口授諸子姪及門生說一經不移日可竟其熟貫如此天資高一目嘗數行下為文若風掃電掣不加點竄萬歷己酉以毛詩擬魁復乙時多惜之平生誦法必本家承性雖不羈而好德獨著少鰥不再娶好飲酒不計升斗無觥籌遜謝之煩時不欲飲雖強之圭勺不入於口顧卒以酒亡年六十六萬頃字伯聲生而淳篤束髮能文有聲諸生間篤志攻苦即冬月衣不解帶就枕旋覺朗誦達曙以為常聞毘陵姜鳳阿太史家多藏書就學于其姪尊生得盡讀之所作日富復質于姑蘇徐汝廉與賀公調侯豫瞻馬君常兄弟相倡和既屢試不第遂閉戶以筆

墨自娛所著有四子註說心叅全集讀史管見二十卷詩學諧聲十四卷子英

王維寧號江門以詩賦著名日取二王法帖摹畫積紙如邱陵求書者如市一筆不如右軍即毀之償以已紙後窘甚或勸其以鶩羣代耕乃笑曰吾學書豈爲口計耶卒融子敬法以小錢師變右軍墨妙遂稱入神最見賞于竟陵鍾惺爲之記述弟維亮字元明並精草聖入化小錢師與學者講求命筆必以中鋒力挽側曳偏頗之病亦多見賞名賢一時真州競傳二王書法

國朝徐濂字泗若號湜仙資性深雋讀書足不窺戶雅好古文于史記猶極力摹肖嘗冬月坐火奩上披古人文讀之烟滿帘幄手不忍釋僮僕視之絮褐焚已尺許弗覺也又好爲詩種花一庭時與友人醉吟其下或共相斷論古人得失按視架上書卷帙次第

言不爽夢寐中時譫譫誦誦與鬼爭辨其嚮往專密大率類此所言有緯雯堂詩歌史遊史論歷代帝王世紀若干卷

子有甲字起明以明經司訓廬江時學宮茂草奉先聖以茅檐甲與邑令經理構建不足自變儀產襄事復構講堂置經史諸儒書近思錄率諸生誦習榜二語曰此中天地自大其間晝夜常通遷婺源教諭上官委盤闔郡倉庫及視縣篆饋遺千金槩不受在廬刻有潛川倡和詩殿簷餘話集

潘性善字孟談由歲貢選建平學博陞寧津縣令爲人沈潛寬厚動循矩矱雖燕居亦無懈容著頤菴集四卷子祈慶歲貢生

孫企綽字天台宋龍圖閣學士莘老後世居秦郵父廷璋以避水患遷儀生綽聰穎嗜學所著有尚書疏義及古今策略讀史諸論子永烈繕稿藏于家

厲士貞字烈士儀徵人祖舉有厚行父文華八歲禱母疾願以身代士貞自少力學貧無擔石儲妻史氏以維績佐之順治乙酉登賢書至康熙庚戌九上公車始成進士爲文靈快明爽獨開生面士林多傳誦焉

陳啟貞字右周世居儀徵父國相稱長者啟貞少穎異博洽經史文辭冲容弱冠拔貢登丙辰進士卒爲人謙和謹厚鄉國推爲篤行子光表丙子舉人

汪楫字舟次別字恥人其先休寧人徙居儀徵少爲諸生知名與吳野人孫豹人並稱由顧榆學博應博學宏儒之薦試居一等授檢討使封琉球其國有孔子廟圯俾修治之爲文刊石而還出知河南府置學田於嵩陽書院聘詹事耿介講業其中陞福建按察使尋遷布政使內擢旋里邁病卒所著有中山沿革志琉球奉使

錄悔齋詩聞正續集觀海集子寅秉能世其文學

王誥字楚士家世朴樹灣里人祖業濬以友于稱父復衡官主事邑有五股飛差累賴其力辨得免誥少聰穎用郡籍登賢書丁丑成進士選庶吉士授編修差視蜀學歸遷司經局洗馬卒爲人爽朗敏練中年而歿朝士惜之

論曰人恒曰爲文人易夫亦見諸史所列文苑文藝以一時之名有一二或寬者要未可即以槩文人也真之文人即朱仲開之風采峻絕張範中之閎雅博物詎果不足爲哉乃次第采綴得如干人則亦盛矣蓋先行後文古先之教孔子謂躬行君子則吾未之有得又未嘗不三復斯語焉

贊曰藝苑才流代有增加揆藻揚芬含英吐葩敏擅千言博極五車其人雖往其書滿家邑有文人氣象以華

元陳起字起宗清流知縣敏弟也為真州掌刑獄吏夏月多疫旦暮勞問給醫藥召獄卒諭善視囚出私財日具湯餌粥食無德色起艱于子後生子貴貴子四其季曰善官至副使後累世貴顯

明楊景隆城南人居近市口有永新商販臘豕過其巷偶遺二豕景隆為暫收之經宿商弗至童報江干販豕者意大窘迫景隆試探豕腹有物可千金急使人招商還之商感請納其半弗許欲稍遺焉景隆笑曰誤矣設有私心豈能留處此哉商知不可強乃置酒會諸父老請文為壽學訓王威為之文謂景隆嘗還戍卒遺金又還商遺金云景隆晚舉二子瓚珍弟兄友愛瓚女適景中久賜柳佳字世可少為邑諸生宿田舍有僕夫荷籠者昏夜投佳詰得其狀乃竊其主福建千戶王陞解京公帑也欲以分佳佳責以大

義竟訪陞還之陞感以金謝不可督運丁郎中高其義贈以言縣報巡按為表門焉

王福原字繼善為人謹愿與物無競以拙自號年未四十妻喪即不復娶或勸之則曰吾已有子矣遂終身不娶鄉人為之語曰修行王繼善至誠張子和子和名中少孤事母蔣盡孝樂濟人急鄉人重之以是與福原同稱皆以壽終子孫各隸仕籍王尤顯

黃棟字國材和易恬澹無躁競心早鰥不娶或勸之則曰吾有二子安用娶為晚年徜徉詩酒士林重之

張杰字思勝其先海陵人占籍儀真蓋太尉後明初有軍功曾祖英為廣西柳州鎮撫曾伯祖傑為南海衛指揮杰狀貌頎碩年十三從父遊荆吳巖然如成人一日白其祖曰吾叔吾兄萍梗滇南是吾子弟之責盍往迎之祖曰汝子身行萬里能無慎乎杰諾而

往遂完以歸平生輕貲財喜為人排難解紛然好面折人過主于
激諷使悔悟乃已人亦鮮怨之若晚年歛鋒鐸尤有塵外之趣以
壽終

張清字士奇其先世崑山人明初戊武威衛調儀徵衛至成化中
清兄澄始積官副千戶清少警敏通書史大義喜周人之急脫人
于厄有任俠風然自奉甚約獨見義則無所惜弘治間清奉詔輸
粟賑饑授從仕郎獨不冠帶被褐如故人或謂其矯時黃司馬贊
在籍聞之歎曰義而榮不愈于簪紱而榮乎清以爲知己之言卒
葬於青山司馬爲銘其墓曰榮以義勝兮約以泰懲武莫之滓兮
圖史與朋後如有考兮吾文其徵

柳謹字大信儀真人平生不欺兄誠檢校嚴州兄子琰爲嘉興守
謹時往來其間衣不紉綺口無詬詈以禮讓信義稱鄉里弘治間
詔天下高年者冠帶謹年與例近或勸之益甲子以應詔謹終不
肯君子曰利應舉則隱年利援例則詭壽蓋今之爲士者通患也
而謹獨不忍欺賢已

柳東涯琰從兄也家饒于財弘治壬子以賑荒授冠帶平生倜儻
尚風義琰起戶部主事以直道忤中貴外補晚始守嘉興東涯給
之先後夷險猶一日曰吾躓吾弟清貧耳琰每語諸昆季曰如吾
東涯兄可謂罕得晚年與金鎔張豸巫儼等數人結真率會以卒
陳淮字思遠世儀徵人祖厚以醫名父璉知章邱縣淮隨任多所
贊畫父致仕歸其兩叔欲析產淮即請以祖宗遺業悉讓兩叔自
置一宅環堵蕭然揭曰澹軒雖異居而親睦不渝時人難之

朱昱字崇昭自其祖由常熟遷儀徵門祚艱薄至昱能振拓稱閭
右質性篤厚恥議人過凡士大夫至者禮敬之姻族之孤寡及貧

寔者周卹之有欺給者弗之校曰彼惑爾吾顧不能容乎晚年自指一原語其子曰樂哉斯土吾生田于是吾死其妥于是也卒即葬焉其子瑤讓產還金捐造朱家橋以尚義著聞

吳一瀾字觀瀾以鹽筴客儀家于城南萬曆二十三年大饑邑令募富室輸濟多不應瀾適自楚市米歸急白令曰今有米千石糶之可得倍息年饑居奇誠不忍願以半供賑令曰不繼奈何瀾曰真即距楚遠乘風上下月可達也但得毋錢廣糶以子米利貧亦易耳富者感動共集得官民錢若干瀾周迴糶糶存濟無算子明德有文名

樊城號思齋為楚府典膳幼孤有意氣嘗遇故人子鬻客為奴即捐金贖之歸宗遊豫章見一不遇士欲自廢慨然贈百金慰使卒業後成進士報之不受有友人假其名稱貸者以久負致訟輒棄

千金產代償終不自明時稱其厚士大夫多與之遊子珠琮皆邑庠生稱孝友

黃鑿字守銘家素約茹貧力學遇人急嘗推食周之見鄉有訟者則必勸止之不止必陰解之嘗語人曰施濟無論窮達視吾心力而已嘉靖甲午登賢書為灤城令出滯獄清逋負去之日民思其德

王業宏字元伯由邑庠生入太學不好華侈居家以脫粟自供而出精鑿奉客家業日饒而布袍綦履終身泊如遇知名士舟車過儀必禮而下之殷殷忘倦建家廟以崇春秋祀撫孤篤友一鄉稱之子復旦成進士

汪士輝字德光生彌月而母歿伯父一柯早亡無嗣伯母程撫之為伯父後長而事程盡孝乙酉本生兄士燦殞于兵輝冒白刃覓

之負骸歸殯事嫂撫姪不以出繼異念鄉里稱之子有培

附錄

宋汪文中歷陽尉急公浚市河董築翼城建昭明祠

汪正捐資助浚諸河

胡彥膺甘露鄉曹村富室捐修石梁浚井濟渴

明侯觀正統間歲歉以稻麥二千四百石捐賑詔旌其門賜璽書
獎諭同時有王志羊昱辛興者各輸粟麥千石咸旌其門蠲其身
役令有司優禮

姚經字大經先由長洲遷儀徵家初拮据至經始富經性質直贏
不忘約獨濬河造牯為石衢以便行者力而行之鄉人稱其義

馬必健字本行萬歷十六年歲饑輸粟五百石協賑

李聯芳字仲茂嘗造飛虹橋民不病涉歲大侵輸穀八百石濟飢

李德映字韞之萬歷丙申歲歉賑穀二百五十石

王汝立字成甫南京光祿寺珍饈署正乞休修學宮創義田義房
以睦宗族立義塚義渡以便貧民會倭警議城廟灣汝立自詣督
撫捐白金三千兩助之

汪鑣字正南萬歷間邑遷儒學鑣出銀八百兩助之

王尚宗字宗大助修學宮

劉學德字芝亭置塚地施棺材親舊有貧不能葬者多出資瘞之
嘗于揚州道中遇一婁人鬻子女者為捐金贖之又給以金為活
焉

劉學恭字和字崇禎庚午邑大水民飢患私錢變亂市幾糴閉學
恭慨然置粥施之計日食千餘口行之一月

吳潛育嬰拯溺

陳起龍字效興崇禎間爲樞以函道殪

李萬鎰邑令姜塚獎其謹厚

國朝蕭道生字培元歲饑捐賑又捐貲獨修龍門橋

吳汝漸字非止甲寅兵變嘗贖婦女之被掠者

馬承烈字爾公捐修學宮

洪良恪睦族周急已已以八十領肉帛

許松齡字勁菴承遠子內閣中書與吳愛同捐修明倫堂擴大成

殿

張永業與弟承教置義田以贍族又輸穀備賑

李俊德施枵材瘞枯骨

陳章施藥育嬰

論曰子長傳游俠貨殖徒以自寫其憤不免輕儒而怨貧是以得

君子之譏以若所稱義有足多富好行其德要亦豈可盡沒耶乃後漢以來諸史皆無取郡邑諸志由之遂爲禁例急公義民類書姓名槩不與傳余觀急公義民諸人居貨而能施類俠而無犯法正不可不有以表之也但儀徵前志人有一傳傳或連幅噫又濫矣故哀取義夫之類及有長厚行者成一篇而並以輸助急公者附焉裁之實以進之也慕義強仁者宜有以識此意矣贊曰江河日下習俗日衰漸于媮薄莫克自回有人於此利濟是懷見義勇爲超乎輩儕歟也可風弗累於財

隱逸

唐陳融廣陵崇邑人遊不出鄉年七十二卒貞元初呂溫寓居是邑見鄉人父子長幼各有倫序歎曰芳蘭所生其草皆香美玉所積其山有光殆有賢者生于是乎遂停車累日周訪故老皆曰嘗

儀徵志卷二十一
有陳融孝慈仁信鄉人化之今也則亡清風猶在温慨然曰先生以純德至行沉落光輝乃披典校德謚曰貞晦先生

宋征集事母孝居鄉恭謹與人未嘗校短長好蓄書能詩有子五人長復次貴相繼登進士第集卒王安石為表其墓稱為淮南善士

傅集素以行義文學為鄉里推重徽宗時勅舉八行刺史郡守以集應詔屢請就道集堅臥不起時人高之

杜嬰字大醇好讀書為人曠達而廉清自託于醫無負富貴賤請之輒往與之財非義輒謝不受時時窮空幾不能自存未嘗有不足之色善言性命之理其心廓然無累于物王安石嘗云每與杜君語久而不厭卒後安石傷之有詩云蕭瑟野衣巾能忘至老貧避囂依市井蒙垢出埃塵接物能齊物勞身恥為身傷心宿草地不復見斯人

徐仲堅忠信篤實遇人至謹家貧寓於卜雖疾病色笠不垂衣巾不見日得百數十錢則止能為詩亦好屬文有集若干卷

元牛野夫生至正間善為詩才甚敏捷抱大用之具而終身不仕以壽終

明黃儀字庭鳳儀徵人少孤事母孝長舉茂才不就遂志遊覽東入吳會北如淮泗歸遇奇書即購之手不釋卷常有悟處即丹其句微詞與義粹難解者輒粘于壁熟玩之尤熟諸史上下數千載事口能道之善相人術決壽夭休咎往往奇中或叩之曰此偶中爾同時有俞處恭者亦隱流也獨折行輩與儀交曰吾與他人言不覺欠伸思睡黃生來使吾洒然儀年八十一卒後以子瓚貴贈官

江九臯字鶴誠其先歛人遷于儀博學善屬文爲太學生屢試不遇退而著書尤邃於經學遭亂遂棄家遠遊莫知所之

王錫命字芬勅儀徵貢生遭亂隱居寶應之蘆村刻厲堅苦督子力耕四方賓至終不以貧不留也其尤與友善者北平劉文焰梁以禕中州崔干城長水吳鉏時相過從或放舟湖中俯仰劇談酒酣輒嗚咽流涕或竟相持痛哭湖濱見者駭愕不知所謂親戚之罹難無歸者分宅授餐數十年如一日卒後返葬於儀徵

論曰杜樊川謂出可行于天下而未出始足爲處士則夫天下士可當隱逸之目者代其鮮矣矧一邑乎然列史所載隱逸不等必執此以論恐又隘也故余述貞之隱逸如傅集之屢勸不起尚矣而杜徐仁三君大抵不離介甫所稱者近是至若牛隱于野江隱于游黃隱于書史三隱于煙水即其蘊抱未可窺要皆淮南善士

也苟碌碌無可采而淪落枯稿資隱逸以覆拙者卒不得與焉贊曰巖穴之士煙霞之客往而不返有同泪溺軒冕之榮畏如惡絀帶索披裘銷光刻跡昔有其人邈焉難即

僑寓

唐竇常字中行金城人叔向長子大歷間及進士第不肯調客廣陵之白沙多所論著隱居二十年鎮州王武俊聞其才奏辟不應杜佑鎮淮南署爲參謀歷朗夔江撫四州刺史國子祭酒致仕卒贈越州都督弟牟羣庠鞏皆工詞章時號五竇所著有聯輝南薰等集

張南史字季直幽州人與大歷諸才子友善以試參軍避亂居揚子再召之未赴卒有集一卷行世

宋呂希哲字元明公著長子東萊人少從焦千之胡瑗學後從張

傳錄卷二十一
載及二程遊聞見益廣以蔭入官王安石欲薦之固辭久之以范祖禹薦召為崇政殿說書擢右司諫累官光祿少卿崇寧黨事作貶知相州旋罷祠晚居真揚間十餘年衣食不給至絕糧數日處之晏然每一日讀易一爻徧考古今諸儒之論默坐沉思隨事解釋門外一切不問嘗有句曰除却借書沽酒外更無一事擾公私為人樂易簡儉有至行遠近師之

陳次升字當時仙遊人僑居真州舉進士知安邱縣擢監察御史歷提點河東刑獄紹聖中論章惇蔡卞植黨為奸又論卞客周種貪鄙鄭居中儉佞由是惇卞交惡之使所善少卿林顏嘗以美官次升曰吾知守官而已君為天子卿士顧為宰相傳風旨耶惇卞益不樂後坐誣謫監永州酒稅徽宗立召為侍御史極論曾布蔡京之惡又論中丞鄧瑄為王安石求賜第及薦其子零壻卞館職

事建中靖國初擢右諫議獻六事言多規切會司諫陳祐陳瓘以言曾布得罪次升入對乞留不報尋出使契丹曾布進紹述之說于上決意用京及使還以寶文閣待制出知潁昌府奸言日至隆集賢殿修撰屢移循州編管入元祐黨籍蔡京罷復待制累官朝散大夫宣和元年卒于真州私第

林彖字商卿仙遊人幼孤隨母鞠于舅陳次升家得盡讀六經百氏書多聞元祐名臣出處大節與宋累朝典故後遷居真州又事劉安世任伯雨陳瓘諸公所得益進紹興初簽書樞密院徐俯以禮延致不往奉母歸閩隆興初監司帥臣列薦力辭乾道四年詔特賜進士出身添差興化軍教授卒

元吳澄字幼清撫州崇仁人自少嗜學嘗舉進士不第遂隱居著書較定九經諸籍以薦擢應奉翰林文字同知制誥兼國史院編

修以母老辭歸大德七年秋至真州淮東宣慰使珊竹介工部侍郎貢鈞湖廣廉訪使盧摯淮西僉事趙琰南臺御史詹士龍具書致幣率弟子請講學次年除江西儒學提舉召為國子監丞陞司業謝病去皇慶元年春又至真州舊從遊者留之講學秋還家拜集賢直學士奉議大夫延祐五年起至京秋至真州疾作不行使者即欲復命澄固辭遂留淮南英宗即位詔遷翰林學士大中大夫加資善大夫卒年八十五謚文正

張壘字達善其先蜀導江人僑寓江左聞金華王柏講道于台壘往從之自六經論孟傳註及周程張朱之言靡不究極至元間中州士大夫皆從之遊以薦授建康路教授改孔顏孟三氏教授乃為制籩豆更定祭儀申正顏孟配位秩滿郵城士迎之留四年有以國子監官薦者引疾不赴攜家儀微依宣慰使珊竹介以處遠

近翕然宗之稱曰導江先生所著甚富卒葬蜀岡

珊竹介字仲清中統間歷同知北京轉運司事江南浙江道提刑按察司使改江北淮東道召入為刑曹尚書尋出為江東宣慰司以目疾去官家于真州嘗延三學教授張壘國子監丞吳澄為諸子師朝夕聞其講論遂有所得篤行于家至大元年疾作隱几諸子跪受其言遂絕明日復蘇置酒高會以勞唁者又二年乃預為兆蜀岡營葬如朱子家禮疾篤麾妻妾環侍者出曰男子不死于婦人之手葬義城里

明單安仁一名居仁定遠人元末與馬得招集義勇捍鄉曲號青軍自稱元帥後以乏食移軍揚州明祖克金陵遣召之仁率眾歸附上嘉其誠授以官令守常州安仁忠謹屢從征討有功上以鄉舊禮待之甚厚累官至兵部尚書致仕占籍于真洪武十九年卒

賜祭葬邑中諸因革建置皆其所疏請以行至今賴之
鄒元標豫章人世稱南臯先生僑居儀徵之五壩氣和而宇峻門
無雜賓士有以帖括請者則進之曰文藻盛矣而名理不勝是性
命閫奧不深究也乃與邑孝廉林之翰立講壇于信國祠闡說心
性之學士多宗之

何士晉字武莪陽羨人萬曆末寓居儀徵天啓乙丑官給諫疏究
張差挺擊一案為刑部王之案左證氣節赫然由大中丞解組歸
真獨立中堂家人無敢過者乃時與邑人為雞黍宴會溫恭謙厚
盡主容之歡謂古人居鄉誼當如此仲子璽祚入儀庠有詩文名
吳家周字文孫號榔梅歛之上澄塘人嘉靖間從其父士英遷家
于儀登進士官禮垣有吏治籍田等疏劾輔臣溫體仁風力獨矯

朝士譚之

國朝紀映鍾字伯紫一字彥子金陵人少為諸生自甲申後遂棄
帖括不事善詩古文詞工書知名海內所至爭折節延致與龔尚
書鼎孳尤善映鍾為人清慎望之岸峭巖立即之殊藹然平生重
友誼推引排解周旋不倦晚厭白門之喧卜廬儀徵以卒

論曰志流寓者凡以其人足重吾地抑以其地寔嘗寓斯人也真
舊志伍子胥文信國及郝行人皆載夫伍僅一過文三日輒去而
郝且拘焉原非流寓者比且胥以名浦文以祠祀烈孝大忠光垂
不朽至郝之著作既詳藝文而一時事義為說尤長蓋皆可載
惟其人之去國浮家擇里而居或以講學或以避亂或以羈旅或
以宦遊賢哲所止為邑大重用是各次其生平始末著之于篇要
期與邑之人物並千古云

贊曰賢者之居何必其鄉所至所止咸藉以光或翔而舉或蟄而

傳志卷三十一
藏久則淹留暫亦徜徉慨慕遺踪山高水長

補志文學

陸端字正夫號方山本浙之歸安人厥考侍御公師令儀徵多
惠政邑人為之建祠留君奉祀事遂入儀庠食餼中乾隆己卯
科京兆試揀選知縣借補寧國府太平縣訓導君性捐潔篤於
內行仕廣文非特振文教飭士習嘗奉檄督理荒政拯卹有法
著有制藝詩古文集及追涼錄晴窓臆言讀畫臚言行世

儀徵志卷第二十二

列傳四

藝術

列女

藝術

宋許叔微字知可家貧篤意經史尤邃于醫建炎初兵火後大疫叔微親行里巷視療所活甚衆一夕夢神曰汝平生有遺恨乎叔微應以三事一以自少失怙不得竭力救水一以束髮受書望一第年逾五十而不可得三惟後嗣不立爲不孝神曰帝正欲命汝官錫汝子父母則不可見因留語云藥市收功陳樓間阻。殿上呼臚唱六得五既覺不審所謂紹興二年以第六人登第繼升第五人在陳祖言樓才之上悉如夢中語著有本事方等書數十卷胡彥龍善畫人物天神寒林水石窠木紹定間苗安撫薦于朝詔爲畫院待詔

元王君迪字居中由江南遷儀以醫著所述古方論無一不詳脉別二十四狀參之以外候偏邪如燭照鑑別只草廬澄爲作可山記以贈

明時寧字彥謚通歷數之學洪武間以知天文舉授五官保章正陞承直郎中官正

滑壽字伯仁先世許襄城人祖父官江南留家儀真壽性警敏讀書日記千餘言京口王居中以醫客真壽從之遊叩素問難經之旨又傳鍼法于東平高洞陽術遂著所至人爭延致名籍甚江淮間在淮南曰滑壽在吳曰伯仁氏在鄞越曰櫻寧生著素問鈔難經本義十四經發揮皆行于世

蔣武生字用文以字行宮子也少讀書聞父論說洒然無疑嘗博觀醫家書遂精其術洪武中以薦入醫院時戴原禮爲院使喜曰君儒也而爲醫吾道其昌矣薦授御醫永樂中仁宗以東宮監國用文日侍左右是時漢王謀奪嫡湯藥非用文進者不嘗隨事獻規多有裨益嘗問保和之要用文對曰在養正氣正氣完則邪氣無自而入又問卿醫効率緩何也用文對曰善治者必固本急之恐傷其原聖人所以戒欲速也東宮善之遷太醫院判謝病乞歸未及歸而終年七十四仁宗即位遣中官陳義乘傳護喪歸金陵賜謚恭靖國初大臣多無謚而用文獨得之仁宗賜札有朕在必不使爾子孫失所之語用文生平嗜學顏其私室曰靜學恣玩羣籍時忘寢食其歿也吳文恪公訥爲之狀自稱門生蓋文恪嘗學醫於用文云

胡仲禮明初以醫名尤妙太素脉有久瘧不止者求視其脉曰此瘧母也須百劑方愈病者服藥至半中止而病未瘳他日沈孫慶

診之曰此須五十劑乃可如言而病已蓋孫即仲禮壻傳業于仲禮者

黃瑄字楚祥少孤為儒生業刻苦久之曰醫仁術也精之亦足濟人去而學醫正統初徵為太醫景泰間院使董肅薦于上召見便殿自是掖庭有疾率召瑄治數賜白金文綺英宗復辟遷御醫尋奉詔採藥敕階修職郎是時招四方名醫集闕下命瑄統之成化中遷南京院判三載引年歸年七十九歲卒後以子用貴贈奉訓大夫南京兵部職方司員外郎孫應夏紹其業亦有名

蔣松號三松院判用文裔工山水法米元章黃子久時稱名筆陳寬字重德善寫真百不失一子樽亦世其業

李杜字思齊傳父伯樓業以醫名

殷渠字度卿家世為醫至渠獨精萬歷癸未歲大疫至比閭闔門

不起渠部勒甲乙諸法晝夜奔問所活數二百人皆不受餽遺吉

水羅從先子假歸一舟徧疫莫治渠館而痊之羅以為再造拜之贊以為神市有昇棺過者淋血血色新渠曰棺中人未死昇何之昇者曰此婦人欲免身而不得者渠曰可立活以針刺心側忽下一子婦亦徐活或以問之渠曰婦將免身兒手握母心故痛至死子又不下故淋血色鮮針之則兒手痛必脫兒下而母活耳後視兒掌心果有針痕一時傳其事號為殷仙

譚神字子羽官鴻臚署丞少聰穎能詩慕文徵仲畫師事焉遂工其法

劉松泉世醫也邑人求視疾無貧富悉奔其急每夜歸則舉所得藥金不篝燈視而雜置之家人詰其故曰恐有豐嗇美惡不如渾也一日黑夜歸有偷兒洞壁而入即以所得金悉與之誠曰度足

汝為活無為此也其人懇謝去日出有時鮮食品在藥臺上莫知所自後乃數數劉怪之念其時含桃將薦密規候焉見一人置新櫻一籠趨而出急訊其人即前黑夜受金者曰今改行能活皆公之賜劉再三切戒之而饋始絕其弟亦醫也啗魚羹而咽可以言不可以下勺水松泉眇曰無病命取象牙為屑和沸酒飲之立愈弟請其故荅曰此魚鱗橫氣門也鱗輕言出則肺氣沖之而開物入則閉象龍種能化諸骨角沸酒下之即融耳晚年失偶其子買婢以進嘖蹙曰吾老矣奈何誤人少女製妝嫁之壽至七十餘一日沐浴冠服端坐而終

劉爵字陽湖幼從譚子羽遊吳門學文徵明山水盡得其妙子之卿次之印俱以画名孫世珍亦能画

李騰號小塘以眼科名著有七十二問按七十二候以明內外障

之得失嘗有一卜性人目腫久藥罔愈瞻曰子目易愈也但恐此客火流毒于股旬日必暴發其人遂日以股為憂一藥而愈股亦無恙又一氣虛人目暗如行霧中受苓朮即眩瞻曰子以沸水浴兩足亦無藥而瘳或問其故瞻曰性暴人最不耐疾心愈躁而目愈病今移其意以憂下即易療氣虛人榮衛不和湧泉穴位足底熱之則可上達於泥丸必血和而藥始效有李節鉞妾病目瞻曰一目膿出方愈李慮損貌瞻曰以虎睛調藥則膿從鼻下無傷也李果捕虎取睛治之如所言王荆石相公兩瞳反背瞻令端坐置書于几用金針從腦頰刺之初撥曰見黑影矣再撥曰見行道矣三撥則筆畫朗然曰君其神授耶將千金謝瞻却不受唯取其園中一綠磁餅蓋王曰賤物何足貴瞻謂余久得餅失蓋此其匹也王以為誕使人驗之果然某舍有茶僮火爆眯目瞻為縛僮于柱

手探取其睛寸許洗之炭屑出而目愈更著有育神夜光丸方蓮
子金針鼠尾金針說言目內障者必藥以百日醫者齋戒亦百日
正心誠意而後可施非天霽日朗絕無雲翳及時日遊神合吉卒
不輕用今其書甚傳

吳洵美字冲符別號南郭老人學書刻意臨摹嘗言點畫波撇不
通六書之理書不能工也每聚古人名帖積若列雉而身寢食其
中至十數年書以是稱善洵美故歛著族家儀久其子宇安登賢
書孫多列庠序有法帖傳世

姜峨字如洞幼治舉子業弗就習醫而精萬歷甲辰癸卯間天疫
峨治之皆觸手驗遇貧之一無所取間出所有贈之以資調攝子
振齊世其業

字震卿真諸生幼警敏異常十二歲即淹通經史辭賦書

家靡不精詣又通天文遁甲奇門太乙六壬諸家秘訣

小事如

響遂棄諸生遊京師時奢酋竊發鄖撫楊述中聞其名延為上客
為贊畫諭平之題補督府標營遊擊咨部推用會劉興治倡亂東
方東撫沈均聘之入海撫安事上名在第一推補蘇松等處遊擊
將軍都指揮僉事顧卒以依人為恥即歸里杜門著述卜益奇中
壬午流寇猖披龍占之曰茲徒碌碌無為天命已有歸惜予不及
見矣不肯竟言前一月自言死奮筆作律詩二十首閱月卒年七
十有五無嗣著敦復堂集尺許所積多奇書皆散逸

國朝胡尚禮字景初世醫也註素問輯有胡氏醫案

吳遠字近之其先歛人幼嘗往來文徵明丁南羽家傳其筆法以
善画名子寅尤工傳真

姜調鼎字玉鉉太醫院判端六世孫精於素難諸家子以寧亦以

醫著

論曰志藝術者重利民用而又欲人之擇術慎也天地之大德曰生醫以生人為術精之則通於神明參乎造化無過之者矣其次卜筮示人以趨避亦猶夫修吉悖凶之道其次書法于儒者為最近程子特戒人不可好而喪志耳然自作字未嘗有漫為者惟畫則又其次也誠以之按山川險易寫風俗美惡亦足為用於世舍是奚貴哉故論次藝術獨于滑壽殷槩諸君為最詳餘止存其略焉

贊曰維藝與術雖云小道徒涉其藩莫窺其奧苟能精專實多工

列女

朝列大夫愍女幼讀孝經論語能通

孝及笄歸將作監主簿馬元穎建炎二年賊張遇寇真州榮與其姑及二女走維揚姑素羸榮扶掖不忍舍賊至以兵脇之不從賊怒傷其姑又殺其乳媪榮叱賊曰天下豈有無義而存者我雖婦人不求苟免賊又殺其女欲挾以行榮遂自刃其脇厲聲詬賊而死其徒曰殺義婦不祥數日果敗晉陵鄒柄為傳刻石

明閔氏曹三妻新城鎮人曹溺于江閔年二十九遺孤仲明在襁褓妹諷以再適曰吾寧貧死不汝聽卒年八十餘永樂四年旌表翰林學士曾蔡贊曰如蘭之芳如雪之潔肅乎其義確乎其節秉素志之弗移職婦道而無缺幸沾沐乎寵光誠有華于閔閔若置古列女中可以比共姜之操令女之烈

蔣文貞張二妻七都人洪武十年張賈於句容溺江死屍不能得文貞年二十四號痛幾絕家徒壁立苦節蕭然既禫嫂諷之嫁文

貞誓死事姑范惟謹姑壽終葬祭以禮教孤中就學奮于貧以行
義稱鄉里永樂四年旌表禮部侍郎陳璉翰林學士王汝玉皆有
傳贊

徐氏千戶所殷成妻自幼閑靜孝謹有志操年十六歸成二十六
舉一子方三月成選征交趾臨行語徐曰吾此行萬里外寄身鋒
鏑死生未可知顧二親老矣子弱家無贏產脫不歸奈何徐曰第
往勉力王事即不諱不辱也是年冬夫果死有表姑微探以言若
欲其他適者徐正色曰人各有志安可以鳥獸待也今夫歿異域
舅姑垂老遺孩在抱苟有人心安忍棄之以死自決由是無敢言
者盡力蠶績畜養以給上下二十餘年舅姑壽終竭力營葬子克
樹立家亦漸饒而徐年且七十餘矣宣德初詔表其里
邱妙貞黃士賢妻少司馬璘祖母也年二十七而寡初其家有趙

姓子入贅者久合兩姓爲一族貨產器物咸相共時趙妯欲獨有
之將欺其孀姑謀給貞改節貞聞而泣且誓舉酒酹地曰所不能
入先廟而更圖者有如此酒趙乃氣沮由是養姑鞠幼攻紡績裁
紉服勤至老暑榻雪牖篝燈熒熒閤左右婦嘗慄然曰不見黃氏
母勞乎然性甚嚴婦及諸孫婦事之惴惴或相聚語聞其聲輒相
戒無譁其肅如此年九十卒後以孫瓚貴追贈淑人

高氏錢信妻早喪父母育於兄慧信入贅其家生子定二歲而信
亡高年二十四慧念妹少欲更嫁之高泣曰賴兄長育之德不幸
至此倘容守節撫養孤兒以保有錢宗則兄之德與父母同遂引
刀斷髮以示之慧乃不敢復言尋慧亦亡慧妻陳氏年二十八子
廣未齒厚方襁褓或以改節勸陳曰婦人失節生不如死有二孤
在無相逼也于是嫂姑同心共守逾三紀諸孤皆有室家日向成

立厚隸仕籍正統間旌爲雙節之門四明陳祭酒敬宗爲之立傳
宗氏邑文學杜景登繼妻江都人年十七歸登舉一子葵芳甫歲
餘即稱未亡人家甚貧困窘而投繯者再顧不忍棄孤乃已惟日
營緝紆以支晨夕葵芳稍長知母悲辛狀苦志讀書爲世知名同
舍生請于學使者表其節

張少姬萬煥妻張東溪次女也年十七生子培二齡而煥歿初姬
姊適王氏已先姬孀居不嫁姬至是感泣告父母曰吾姊妹不辰
俱失所天姊無出尚矢不貳兒有子矣復何求哉遂一意撫孤歷
三十餘年教子成立子孫綿衍昭陽陸西星著有張節婦傳

侯氏賀一梅妻侯維亮女年十六適梅期年梅亡誓不更適止遺
一孤復殤或諷之更嫁泣謝曰大奪吾嗣不能奪吾志貧無生計
針刺自資年至七十二卒

顧氏侯于衛妻年二十五衛死以節自誓有以貧爲諷者則言夫
雖死必與夫之子女共生死家無立錫地嘗枵腹以撫孤教男操
作女蠶績衣食外更營婚嫁年七十有四每自憶往事即懼且喜
云今日可以謝衛矣衛維亮子里人重其世德

陳氏邑民陳細女儒士林文鵬妻年二十適鵬生子之翰三歲鵬
歿父細有微言氏若不喻但毀容茹苦以節孝自矢姑病臥牀者
五年氏周旋扶掖嘗湯藥手滌廁踰無倦色聞者歎焉之翰長登
賢書請旌于朝建坊表廬

陳氏民部濟女孫太學生嘉禾女幼而貞靜事繼母極孝年十六
適姜起周因早子不育遂爲置妾後乃舉二子而夫卒茹苦自勵
聞姻戚中某婦易節即屏不與見居恒舉古節義事戒二子曰丈
夫立身比婦人守節一失則萬事瓦裂聞者以爲名言至次子士

望成進士官秘書而病革遺訓但曰須做好人年七十有七追贈孺人再贈安人鄒元標爲之立傳焦竑爲誌其墓

徐氏劉君用妻未字時割股愈母疾十八適君用二十六君用卒觸棺仆地誓即同穴時長子芳名四歲次彌月其母以撫孤切諭之不死家值中落辟纊自給親族嘗有以行權爲言者徐大痛哭至夜分投溺庭池中以救免守貞五十二年壽七十有八病革芳名遠賈于外忽心動并程而歸得與母訣人謂其孝孫啓元曾孫嘉德繼漢皆諸生

劉順貞陳士仁妻御史劉學詩妹士仁幼從學于詩遂以妹字焉歸陳後能事孀姑士仁讀書于外得以無內顧憂生子元吉四歲士仁歿劉抱弱孤恐恐然性不克成立是慮食貧如飴課子讀書至元吉入學食廩而色始稍相憚居恒常以婦人守節爲平常事

遇姻戚寡者必勸以勿再適往往感動苦節六十餘年元吉膺歲薦始歿

戴氏倪學錄可大妻崇禎丁丑可大守霍邱爲賊所害氏聞即奔哭拜之自縊死有女年十二見母死父難亦自撞死于霍邱官舍王氏袁惟友妻登州棲霞縣人崇禎中登亂避居儀徵惟友以疾死王尚弱齡子生方六月痛夫淪歿旅次無依傷泣久之已復慨慷曰天乎亂離方未艾也熒熒其何之吾夫婦本同日生今且同日死不亦可乎即日投繯自盡聞者異之孝廉吳纘姬有傳

黃氏劉學聖妻明經黃思睿女性至孝幼聞父訓喜談貞烈事少長頗涉經史適學聖三載生子欽立將一歲學聖亡黃剪髮納夫棺中以葬誓以無二姑垂白失明且病黃侍湯藥飲食不牀席者九年欽立至九齡孺自是長齋一室壽七十餘諸內外姪婦女無

大小咸奉為閨師邑令先後獎異通邑紳士哀之以詩

張氏李杞妻年三十杞死家無生業子女各二齒俱穉母家誘以改節張曰夫死稱未亡人舅姑尚在兼有子女且李氏伯叔俱列衣冠何自敗倫喪節以傷高堂心而負地下人乎遂自辟纊茹淡不易其守值姑久病日夜左右榻下扶掖不怠教子成立歷四十年卒王世貞李維楨誌其舅姑墓而并稱其節孝云

戴氏儒士詹大化妻性嚴正知禮法生一子起龍一女某化歿有以易節微諷之者戴即引刀誓死以明不二時翁姑皆七十餘戴謹事終養孤方捉抱頗有涎其家者賴戴調護以迄有成龍長而樂行善女適金士杰并著清操大化姪德基妻吳氏基歿矢志守節甲申之變家人謀避兵吳曰吾寡婦也終不欲以偷生遺玷遂不食死與大化妻稱雙節

木工婦居飛虹橋上賊至居人皆走而木工亦棄其妻與幼子去賊謂婦曰毋恐隨我行作我家婦復拔刀擬之曰不且殺汝婦乃挈幼子行至河側抱其子赴水死已而其夫循河行覓之見尸浮水上幼子在懷如故也

井中婦不知何所人距城四五里道旁有井深丈許水半涸有二賊過井上渴謀汲飲俯視之一婦人匿焉二賊喜謂婦曰汝更無可逃盍上而從我婦曰不能自上幸井不甚深必一人下扶我上乃可於是一賊躍而下以肩為梯推婦使上婦既上在上者更俯首下引賊婦乘其不意按頸奮力擠之賊亦下井固狹二賊顛倒井中婦因取井旁土石擊而填之乃奔去

左氏日照令李姑妾生一女崇禎辛巳大疫姑歿嫡子婦偕歿遺孫幼左年未三旬決不他適撫女女長擇配往依之以老

補傘婦不知其姓氏其夫以補傘爲生居邑西郭外崇禎末賊至其夫棄婦逃賊挾婦以行婦無懼色隨行至一橋橋中斷橫一木爲渡婦陽懼曰予婦人安能渡此若掖我以行可也賊曰諾即掖婦渡橋婦陽懼逡巡牽賊背而持之甚力至橫木上婦大呼奮身一躍與賊俱墮水中賊力自奮起爲婦所持不得脫岸上賊夾河而視欲擊婦恐并傷賊莫知爲計而賊屢浮屢沉久之遂俱沒王氏劉志德妻居常嚴色笑步屨不出戶限志德早世遺腹生子苦節教養方成就舉一孫而子又早世伶仃撫弱孤戶庭多故悉以一身當之歷年八十二知府韓文鏡表其節

鄭氏郡庠生吳爾成妻兵部元勳妹也歲甲申奉姑避吳門貧苦萬狀其兄屢邀之歸寧氏堅辭不赴曰吾姑與吾夫同處患難吾獨得安土寧忍耶後回郡兵入城投金魚池死

田氏李鐵匠妻美而賢崇禎十七年五月朔高傑兵至儀徵大肆劫掠一兵突入其家而田以死拒遂挾之馬上而去至南關一木橋馬不能渡因給兵攜手挽行至中流婦乃用力曳脫兵聳身下湍波兵亦隨墜水死守埤官民無不稱烈

陶氏金時綉妻潘氏綉子光遍妻甲申夏有亂兵大掠儀徵陶語潘曰男子可逃吾與汝皆婦人也勢迫矣宅后深池即吾兩人死所潘曰奈幼妹何陶曰此金氏一塊肉安忍棄之於是婦抱姑姑抱幼女同溺死池中賊去三人抱浮水上人稱雙烈

張氏徐爾成妻經歷榆芳女年十七而寡家貧徹骨但以女紅營舅姑甘旨數年舅姑踵亡竭力殯葬供祭祀終身子老無依

劉氏蔣得春妻諸生劉嘉言女幼嫻內則習經書舉三子年二十九春歿時姑徐老疾不能起飲食櫛沐皆劉扶植歲祓紡績營養

如是者五年姑歿痛毀欲絕訓子應芳詩書皆口授卒年五十四
關中秦所式贊云猗嗟劉胡不造姑耄老子襁褓孝而慈養兼教
孟母賢共姜操後必昌天之道猗嗟劉德何劬

支氏陳廷進妻年二十四生子三歲進為海陵掾客死支喪殮成
禮麻哀其孤以襯歸祇事孀姑姚既盥漱必詣姑所以承其歡日
夕必稟姑命始歸寢以為常趾不嚮戶身不襲綺氣宇嚴整家人
多憚之知縣姜採旌其門

殷淑寅城南隅人生兩月父亡母改適挾寅去鞠之及笄納張氏
子聘寅性嚴潔精女紅不類孤寒族而張氏子則凡兒母舅每過
其家則歎曰許張氏兒良誤彼終能振乎寅聞而言于母曰舅誤
矣窮通命也許之奚悔為無何母卒後父復娶後母張氏子婚有
期而病死寅初未知是夜二更叩門急云張家送庚帖來寅驚惶

審其以是告訃也遂給後母還寢乃整容更衣即取庚帖

帖取

蝴蝶簪笄上自縊死年十七數日後張氏子家舁棺求合葬

焉

劉元英劉應麒女年十六字李繼中未嫁而繼中亡英聞訃長

歎

仆地淚交頤下口絕水漿者七日自縊于寢室有司上其事巡按
御史顏親拜其墓有詩云未經夫面為夫亡豈比尋常列女行不
是等閒來下拜只因千古振綱常京山李本寧為之傳

郝淑英光祿署丞郝璠女字吳定周末嫁而歿淑英聞訃即誓死
相從家人多方防慰之女惟含淚無言不飲不食鬱鬱數日夕語
父母曰行矣兒得從吳郎于地下矣遂死

許娥江都人年十七許字儀徵楊之薇頃薇死娥欲來俱死父母
不許中夜即自盡以明不二事在崇禎壬申郡丞姜題門褒異
黃貞女其父本微賤無行母早死靖南侯黃得功之駐節儀徵也

兵與民頗相安縣無賴者貪兵財多以女嫁兵貞女年及笄有姿容其父日與媒妁謀曰軍中苟不惜貨財吾無所惜吾女於是兵來視者紛紛父必告女曰此千夫長也又曰此百夫長也又曰此為參將此為遊擊行且為總兵矣已而一兵來納采父謂女曰女行有日矣他日富貴毋忘爾翁女唯唯越數日女知期已近乃盛衣裳為容貌其父不之疑也女遂乘間投環死

王二姑郡功曹王國祚女許字吳與鄰未及嫁揚州破國祚教以名節女曰唯陰與嫂如東鄰并不獲投遂取利刃自剄而絕

國朝蔣氏陳文道妻慈厚不妬文道五十無子為置妾傅氏生于國相三歲文道卒蔣語傅曰汝年方十九能與我共守乎對曰陳氏屢世單傳不絕如綫育此藐孤正吾兩人事也何辭為蔣于是益厚遇傅撫相若已出授室生孫而蔣卒傅獨守六十餘年乃終

後季孫啓貞成進士

俞氏高思旭繼妻年二十六旭亡矢志守節時有前妻子岱逢年及孫文台在未幾岱之逢年亦亡岱妻王氏逢年妻鮑氏俱少無出姑媳相依以槩績為生後文台又亡妻吳氏亦共守一門三代四孀合品咸稱苦節

陸氏姜之焜妻性貞肅寡言笑舅姑既歿事祖姑曲盡孝養焜性卞小逆即暴作陸弟順而解之乃反和陸年二十八焜死矢志撫孤聞母家欲搖其守即勺水不入口者數日自是益深自匿三十餘年罕有窺其面者惟晨夜紡績而已今年七十率二子家于昭陽

李氏諸生陳宗孔妻性嚴正初家溫不事華綺訓子必式禮義以念祖克家為志謹侍太姑陸坐立寢食必請命而行順治乙酉子

邦楨已得薦以策稱承學二字置之副車首李聞而痛責之監臨
毛九華彙題五省貢元已下禮部李不命就戊子學政蘇銓選充
北雍又不命就總裁廉知承學所本劉肇國欲以秘書許之亦不
命往唯督邦楨勵志苦節甘貧以終其身

朱氏陳宗文妻年二十六文故煢煢兩孤生業蕩然朱攻纂組飼
之奉主位小樓中侍文如生經月不一下樓教二子必使跽于主
前使知悲感嘗絕粒惟忍飢飲水年六十六卒孫方炳也諸生
張氏世家女適盛大叅孫可畏年二十可畏亡子世賢三歲張撫
而教之有成初家人意其幼以他易節婦向張比論張嘗曰婦人
從一而一即狗彘豈人也即日斷髮毀容飾終身不施膏沐不
簪一花一日有好事兒女暗以茉莉簪張假髻中張不知也入臥
內嗅香即拔而擲之地自是并假髻去之年逾七十五今尚健

劉氏王房妻年十八歸房生子未及周而房病劉每煮藥必跪祝
于天進之至十數月衣不解帶子忽殤房亦歿劉曰婦所依者惟
夫與子今俱亡獨生何爲于是哀毀以死

王氏諸生路逢春妻春有文名王十五適春十八春死遺身舉一
女有爲王緩頰者曰女即長異姓家人守此欲何待乎王痛且憾
善視女至長嘗語女曰汝不識汝父若更無母是徑無所從來矣
女既遠嫁王依之女又舉女女之女且長而女死王即倚女之女
爲命終不以貧窶隕志

施氏王國祚長子鯨妻揚州破時施以其子託之蒼頭王倫夫婦
陰與小姑同投鄰井不得正欲以刀自剄而兵已入室國祚夫婦
及小姑三子良已死施度不得脫給兵丐生乞容一拜翁姑許之
因大慟哭舉刀一勒而仆兵舍去施未絕但口不能言隱聞有人

曰風入肺即不活或又曰得馬糞裹之即生惜暗矣治如法而施起蓋預匿其子之蒼頭夫婦也蒼頭夫婦已俱陷營中施曰不得吾兒生不若死復百計求之蒼頭夫婦果抱其子至徧覓國祚夫婦及三子良幼子鱒與小姑骸骨同扶襯歸葬儀徵孤既授室且弄孫王氏得以有後

侯氏劉世彰妻彰姊劉氏適陳德宜爲繼室彰與宜偕之楚同死於獻賊五載後凶問始確兩家相勵以節飲食起居與同侯子元祐自一歲撫育成入劉孤死一女適諸生高峰兩人數十年砥節不衰

陳氏劉明通妻年二十二通亡遺孤崇政五歲家赤貧人或以改節勸即泣誓曰餓死事小失節事大矧茲藐孤冀延劉氏一綫天若不祐有死而已無以是見薄也終身不事鉛華刺繡文以自活

享年八十有八

高氏諸生白繪龍妻上元尉高椿年女適龍五歲龍歿止一子未幾殤設龍影像于臥側寢興必拜坐必對一飯一飲必泣告歷今四十七年不渝事舅姑有加禮翰林楊士驄贊之曰志堅兮如金行潔兮如玉肅肅兮其儀屹屹兮其節誓以天日兮之死靡他克謹婦道兮甘旨罔缺方彼柏舟兮千古同轍

薛氏名一璉父邦亮夢六璉而生遂以名幼事父母孝十五嫁武人子李賡孝舅姑如父母三年而賡死璉曰古云死易託孤難吾不忍見李氏之後不成立也時其子開泰方一歲攜歸于父家撫之二十六年生一孫始解感容乙未年卒

曹氏年十六適蕭人張以成生一女成入閩歿于途曹氏泣誓守節或云無子曰必待有子而後守是守子非守節也安貧終志

臧氏戴應龍妾龍艱嗣臧年十六歸龍生子君耀五歲龍歿臧以節自矢有叔計噬兄產數窘臧裂面斷髮益堅所志保持四十餘年子耀補諸生有孫曾人謂戴祀不殄賴有臧耳卒年七十羅氏吳一會妾會無子多置妾年五十諸妾皆無出羅以江右故家女歸會亦無出僅有某妾生一女方襁褓而會卒諸妾皆去羅曰主購我輩竟無能為延嗣者恨莫如何但生共依之歿即舍其女而去大不義時年二十五歲獨留撫女女長為擇望族適方姓子連舉外孫而始欣然曰今而後庶不負吾主矣因依女終其身林氏二都民林鳳女贅婿賀美明盪艇為生贅三載而明以病亡氏悲號三日不食母慮女求死謹防之且曲慰焉已而輟哭進粥一盂會母將出汲于井女輒起曰此固我事遂抱甕以出良久不歸母急呼之不應及井見甕俯瞰其中則女在也母即哀乞鄰人

以竹篙鉤挽而上已不能救但見近體衣帶皆密線所縫蓋其志先決矣時康熙甲子歲事聞建坊旌表立碑井上

汪氏歛西稠墅名家子幼誦詩書嫻禮教年十七歸儀徵廩生鄭為杓為杓家貧恒假館遠方汪獨奉姑視寢饌無失生子岫九歲而為杓卒汪事姑益謹即貧窶甚姑心歡然如子在也親課岫以讀書力行入學食餼汪與姑俱以壽終

劉氏邑人朱介臣妻御史學詩女孫二十早寡撫孤承恩既成人旅死于江西劉聞之大慟嘔血而卒年五十有一劉之姪應星為合葬於朱塋姨子王有經立碣記焉

許氏徽人許天培女幼讀書知大義十七適邑諸生吳正宗二載而寡抱一歲孤以奉吳翁母俄翁母相繼亡有二少子小者二歲初吳母與之訣曰吾死新婦且去他日必令吾孫歸吾宗因指小

者曰幸為我早送育嬰堂憐此兒未離乳也許大慟幾欲死自明乃泣言曰母休矣母即不諱婦固有兩乳小叔可分其一母休矣于是母亡遂並乳兩孤稍長並自課以書久之並遣就良師學又為擇鄰子之醇篤者與俱不則並閉之弗出時稱善教子誤視叔亦子云族人高其義斂百金以周之叔遂請為賈從其兄於楚氏母子貧如故其孤公澤因亦奉母往楚叔事母頗不周遂卒于漢口臨歿曰吾舅姑在儀必歸葬於儀其孤亦亡唯孫留楚地邑有劉顛二生歲為拜掃其墓則向所擇鄰子之醇篤者也劉名敞顧名文琇

鄒氏王之先妻已亥海寇之亂被掠鄒乘間投江死次日屍浮江上之先覓見之鄒屍眼中忽流血聞者異之時年二十有四子起鳳起龍

六天諸生林聲宏女許字廣文于有甲子純淑淑病卒女意中快不快形于言恍惚若有圖者俄而媒妁微議易婚女聞不食數日而卒

蔣氏蔣山卿女孫年十二已亥從父母避海氛誤自梁家灣回為追兵所蹙遂投水兵入水拉之即以頭撞刀鞘拔刀以斷左臂死鄭姑鄭俠如女字庠生程起善善回新安溺富春江中訃至鄭解救茹素日飲泣三年不言笑家人數問之鄭曰欲一赴程門耳父母因遣之程以婦禮見翁姑成善服謀立嗣畢曰婦職盡矣至善心日設奠慟哭絕粒而死督學李嵩陽題旌

劉氏女故誠意伯之後幼許嫁嘉定伯子遭亂喪亡遂不改適其父老無所歸又遷徙不常所至唯獨處一小室人罕見其面諸兄皆遊於四方惟女侍左右終其身女亦全其節以老晚依兄之孫

寄居儀徵

吳氏邑人吳士宣女字汪文斗及親迎日文斗暴卒綵輿及門而返女聞悲悼求赴而父母未之遣也女即截髮髻面矢必死父母許焉女遂以婦禮至為文斗執喪舅姑慮弗克終不欲輒待以婦居之別業吳朝夕隕涕者一年舅姑乃異而迎之成服終喪奉尊章盡禮退而扁坐小樓中雖密戚罕得見者久之文斗兄文學舉次子德齡立為文斗後吳顧之泣且喜曰吾所以不死冀為夫子立後耳非是吾何為至此自是寢食與德齡俱拊畜顧復小有疾調護倍至迨德齡既長受室乃始下樓率新婦行禮閱三十餘年如一日邑中無少長皆云

缺傳者附

明蕭氏李三妻六都蕭六秀女洪武十二年李客死蕭事姑舅勤

井臼撫幼子祥以節孝著

鄭氏徐觀妻五都人年二十生一子公孫未訖觀死苦志養舅姑撫孤幼歷三十餘年

張氏義徵衛總旗王子忠妻年二十七生子甫三月忠死事舅姑撫孱弱三十年人無間言

孫氏張彥銘妻儀徵衛人年二十二生子鐸四月而彥銘卒守節三十年已上並宣德年旌

商氏張成妻五都人商汝賢女年二十六孤兒未晬守貞三十九年

楊氏黃淪妻五都人年二十四孤僑半歲食貧撫之歷四十七年吳氏王寶繼妻四都人年二十五遺腹生子如孝後判夔州卒年七十四已上並嘉靖年旌

張氏高尚珍妻年二十八珍死遺孤思時止三月後領萬曆乙酉鄉薦旌表

陳氏李廷用妻生二子年二十九守節卒年七十有七里人黃秋谷志其墓

高氏侯詔妻年二十守志六十餘年

柳氏姜鎮妻年二十一訓遺孤芳甚嚴領正德丁酉鄉薦守節七十四年

顧氏名善緣李溢妻御史謙女也年二十八守節撫三稚子成立孫曾繁衍卒年八十九人稱貞壽

俞氏蔣文宰妻年二十九宰死遺孤汝昌二歲家甚窘卒年八十二禮部尚書林汝珥題扁褒獎後汝昌以武功著

張氏名善敬廩生李植妻庠生張承詔女年二十二而寡攻女紅以育孤苦節六十餘年

張氏馬應兆繼妻出自本衛千戶年二十一遺孤二人家貧紡績以養長子登雲食廩苦節四十餘年屢獎

林氏陳洪振妻年二十八振卒遺孤二教之成立苦節五十六年邑令上官署門獎之

劉氏謝朝恩妻豫章梓溪世家女恩死子殤取姑家四歲子士英育之成立自二十九歲至八旬府縣屢獎之

朱氏江右人中書舍人王朝官妻年十九撫孤灌有成以壽終將氏張鉉相妻崇禎壬午武舉應辰母巡按御史王鼎鎮獎

鮑氏指揮白應元妻年二十一遺孤世昌周歲守志三十三年昌又死撫昌子晉至成立年七十二漕道縣各獎異之

劉氏姚惟一妻年二十寡奉姑撫遺子苦節三十餘年而卒

曹氏應襲千戶金之潤妻夫溺死年十九子兩月父母憐而欲嫁之曹截髮自誓卒撫子成人年四十八而終

夏氏張嘉亨妻

張氏監生王維藩妻

侯氏生員張元然妻

李氏生員胡從教妻

桂氏王道行妻

李氏焦應秀妻

汪氏吳繼俊妻

國朝臧氏邑民嚴嘉端妻二十四矢志至八十三歲卒

殷氏王大經妻二十五矢志撫子歷年九十三

劉氏萬人秀妻以孝義著守志二十五年卒

胡氏諸生胡汾女衛舍龍三汲妻年十九苦節撫孤數十年以終

侯氏諸生朱邦藩妻潘卒撫子健有成

李氏羅仁美妻乙酉揚州兵變偕嬸劉氏與妾婢等一十三人自

燒死婢菊花爲之舉火死尤烈

李氏諸生高祺年妻年二十九守節四十七年

嚴氏李繼芬妻年二十六撫遺孤將成立而歿矢志益堅數十年

如一日邑人咸敬稱焉

謝氏周栗妻諸生謝朝章女生子耀兩月栗亡苦節三十餘年

白氏七都人衛舍鄧之謚妻撫幼子苦節以老

胡氏諸生王國本妻年二十六矢志以老子任補諸生知縣年文

龍給扁

趙氏張應選妻年二十五選亡無嗣矢志不嫁年七十有八

李氏劉欽相妻生員李桂女二十八撫三月孤孀兆補諸生苦節

四十三年建坊旌表

林氏李梓材妻年十七遺二孤並歿苦志守節事舅姑以老

鄭氏衛千戶王道純妻早寡撫子臣敬有成

于氏諸生王景常妻年十九而寡繼一子生孫振聲娶張氏又早寡一門雙節無嗣

萬氏諸生黃家儒妻年二十八苦節撫子廷昱常割股療姑人稱節孝

邱氏江西人方承式妻年二十七撫孤守節三十餘年康熙十九年建坊旌表

吳氏朱一偉妻年二十四一偉歿無子猶子秉彝甫一月取以為嗣教養成立苦節壽終建坊旌表

包氏趙可成妻年二十九而寡家奇貧苦節三十餘年

余氏熊田生妻二十六歲而寡無子撫二幼叔以長苦節四十年

馮氏黃爾翊妻遺腹三月而夫卒苦節五十年子廷弼

姜氏吏部士望女張國經妻二十八而寡撫子成立壽終

金氏汪應暉妻年二十而寡撫周歲子士紘成立生孫開諫士紘卒媳黃氏撫子如姑姑年七十二媳年五十一

楊氏程時逸妻年二十而寡事孀姑撫遺孤苦節四十年

李氏曹珩妻二十二歲寡撫周歲子玉立口授詩書入庠守節三十餘年

曹氏諸生劉圻妻二十七歲寡撫二幼子成立苦節四十年

朱氏黃侍訓妻年二十三寡撫周歲孤祥成立苦節五十二年
包氏諸生支從義妻年二十九而寡苦節三十五年子孫多入學
胡氏吳自誠妻年十八撫遺腹子廷支成立苦節四十餘年
王氏車又珍妻年十八甲口歲歸又珍十九又珍死于兵遺腹生子鳴和事公姑撫遺孤歷七十餘年

金氏監生王業濬妻居樸樹灣村舍為羣盜所執拷掠瀕死不言
濬所在濬賴以全金遂卒子復衡孫誥登仕籍贈孺人

殷氏王文聖妻年二十六寡家甚窘撫孤守節四十年卒

劉氏庠生吳德宏妻年二十六無子撫二女守節歷年八十有二
鍾氏吳東木妻年二十二無子苦節以終

夏氏汪有植妻早寡無子撫姪正鈞為後鞠育備至正鈞中康熙
辛卯舉人

樊氏生員汪孚遠妻早寡以罪徙邊死樊年二十九撫六歲孤守
節以壽終

盧氏楊節妻早寡八十二而終

戴氏金允嘉妻年二十七寡撫孤六十六歲卒

黃氏夏欽儒妻年二十七而寡無嗣舅姑歿奉祖姑撫二幼叔婚

喪皆賴焉苦節五十餘年

陳氏程志伊妻二十九歲寡奉孀姑撫遺腹女繼子燦成立以壽
終

雷氏侍御鄭為光繼室封恭人年二十一歲守節

劉氏殷震生妻二十九歲寡無子止一女適李之林亦少寡母子
相依而居三十八年教外孫文烜登賢書

顧氏徐光泰繼室年二十而寡守節五十餘年

任氏諸生王明求妻年十七適求求病篤割股療之愈又十年而
寡撫子成立年八十四上官多獎之

吳氏陳雲孫妻二十七歲守節子肇新

程氏汪汝濟繼妻少寡守節子宏謨

吳氏朱之琮妻年二十九寡撫二子鎮錚授室生子後鎮與婦相

繼死遺幼孫二人吳又撫之成立年六十八卒

汪氏朱琦妻年二十四而寡撫孤嘉蔭成立五十四歲卒

王氏廩生汪時佐繼妻年二十九而寡撫繼子苦節五十三年

羅氏吳自克妻年二十八而寡

程氏吳自亢妻年二十七而寡

汪氏吳榮登妻年十九而寡即程氏子婦也

徐氏萬芬妻 張氏姜國楨妻 盛氏張元景妻

沈氏上舍汪萬郡妻 殷氏諸生高凌雲妻 徐氏翁必富妻

白氏王希曾妻 黃氏諸生戴天寵妻 吳氏包希瑞妻

嚴氏吳文焰妻 張氏陳伯聖妻善事繼姑

唐氏漆珂興妻年二十五撫孤成立而終

生存年老者附

洪氏吳之驊繼妻年二十四歸之驊三月而之驊病洪躬親藥餌

衣不解帶者經年至刲股療之終不起洪無子有前妻遺二子尚

幼翁姑垂老洪曰吾且不得以死謝責乃竭力奉養死喪盡禮撫

二子皆讀書授室後長子伏生既入庠而死洪葬之未幾伏生妻

又死洪又葬之遺孫三人洪曰吾以為事畢矣今而後吾事方始

也復為之撫養讀書授室拮据老焉

潘氏諸生黃從仁妻年二十四而寡家貧奉姑撫子苦節六十年

邑令屢獎之

殷氏邢聞正妻年十四刲股救母長適聞正二十五歲夫卒撫遺

腹子成立守節四十一年

汪氏郝正音妻年二十六而正音死有孕甫三月生子懷怙今已

三十六載 已上舊志所載

黃氏生員朱麟翔妻年二十八而寡今年六十有九
丁氏韓嘉鼎妻年二十七而寡守節數十年

方氏汪墀母年二十九而寡今年八十二

黃氏葉蔚越妻少寡守志三十餘年無子

吳氏洪曠妻年二十九而寡年六十餘無子

朱氏生員洪曉妻年二十六而寡年六十餘無子

于氏程浩妻歸浩數十日而浩卒守志數十年

卓玉英趙國定妻年二十三撫孤守志四十年

王氏柳啓鳳妻早寡守志四十餘年

呂氏經宏錫妻年二十九撫孤守志三十九年

吳氏鮑瓌妻年二十六撫孤守志三十餘年

方氏胡恭直妾年十九撫孤守志四十年

程氏許永齡生母年二十七撫永齡成立

樊氏生員李承祚妻年二十八而寡今年六十有四

洪氏高雲龍妻年二十九撫孤守志二十餘年

陳氏高參妻年二十七而寡守志三十年

胡氏吳玠妻二十五而寡守節二十餘年 方氏吳銘貞妻

割股附錄

明馬氏廩生登雲女十四割股療母後適明經蔣廷章

國朝黃氏庠生張兆璉妻割股療姑姑歿哀痛死

劉氏薛肇商妻割股療姑又療夫

馮氏適盛門割股療姑邑令李獎

陶氏王裔昌妻割股療夫

高氏千總王中玉妻割股療姑即裔昌妻陶氏也

王氏熊國泰妻割股療姑獎

黃氏汪九萬妻割股療太姑

黃氏卞時直妻割股救姑

蕭氏女父名長裕年十五未入室割股以療其母

論曰余承乏茲邑始至見民間多好華飾又聞不事蠶績歎為敝俗乃表節婦胡置田食其孤以風邑人嗣後以烈以貞以節孝請表者纍纍比輯志叅稽舊聞網羅近事其與例未符者不載載其有傳者五十三人缺傳者九十六人女十一人其割股及未蓋棺者附錄焉噫盛矣鑿江清淑之氣豈獨鍾于巾幗耶夫俗雖敝必有砥厲廉恥者出焉振作而鼓舞之存乎教化爾若所載諸人姓氏不千載遺芳歟男子守身女子守節一也聞諸貞淑之風當亦幡然感發也夫

曰無非無儀女子之常不幸而獲乃以節彰維烈維貞果日嚴
肅一念無渝萬苦備嘗曾以成編用闡幽芳

儀徵志卷第二十二終

儀徵志卷第二十二

五

